

四庫全書

史部

欽定四庫全書

史部

明史卷二百九十二

給事中_臣劉湄覆勘

總校官編修_臣朱鈐

欽定四庫全書

明史卷二百九十一

大學士張廷玉等奉勅修

列傳第二百九十一

忠義三

潘宗顏

寶水澄等

張銓

何廷魁

徐國全

高邦佐

顧頤

崔儒秀

陳輔堯

鄭國昌

張鳳奇
盧成功等

黨還醇

安上達
任光裕等

李獻明

何天球
武起潛

徐

澤

張春

閻生斗

李師聖等

王肇坤

王一桂
上官蓋等

孫士美

白慧元
李禎寧等

喬若雯

李崇德等

張秉文

宋學朱等

顏孕紹

趙玼等

吉孔嘉

王端冕等

邢國璽

馮守禮等

張振秀

劉源清等

鄧藩錫

王維新等

張焜芳

潘宗顏字士瓚保安衛人善詩賦曉天文兵法舉萬厯

四十一年進士歷戶部郎中數上書當路言遼事當路
不能用以宗顏知兵命督餉遼東旋擢開原兵備僉事
四十六年馬林將出師宗顏上書經畧楊鎬曰林庸懦
不堪當一面乞易他將以林為後繼不然必敗鎬不從
宗顏監林軍出三岔口營稗子峪夜聞杜松敗林軍遂
譁及旦

大清兵大至林恐甚一戰而敗策馬先奔宗顏殿後奮
呼衝擊膽氣彌厲自辰至午力不支與遊擊竇永澄守

備江萬春贊理通判董爾礪等皆死焉事聞賜祭葬贈
光祿卿再贈大理卿廕錦衣世百戶謚節愍立祠奉祀
永澄等亦賜恤如制

張銓字宇衡沁水人萬曆三十二年進士授保定推官
擢御史巡視陝西茶馬以憂歸起按江西時遼東總兵
官張承蔭敗歿經畧楊鎬方議四道出師銓馳奏言遼
東山川險易我未能悉知懸軍深入保無抄絕且突騎
野戰彼所長我所短以短擊長以勞赴逸以客當主非

計也昔臚朐河之戰五將不還奈何輕出塞為今計不
必徵兵四方但當就近調募屯集要害以固吾圉厚撫
北闕以樹其敵多行間諜以攜其黨然後伺隙而動若
加賦選丁騷擾天下恐識者之憂不在遼東因請發帑
金補大僚宥直言開儲講先為自治之本又言李如柏
杜松劉綎以宿將並起宜責鎬約束以一事權唐九節
度相州之潰可為明鑑又言廷議將恤承蔭夫承蔭見
誘不知輕進取敗是謂無謀猝與相遇行列錯亂是謂

無法率萬餘之衆不能死戰是謂無勇臣以為不宜恤
又論鎬非大帥才而力薦熊廷弼四十八年夏復上疏
言自軍興以來所司創議加賦畝增銀三釐未幾至七
釐又未幾至九釐辟之一身遼東肩背也天下腹心也
肩背有患猶藉腹心之血脈滋灌若腹心先潰危亡可
立待竭天下以救遼遼未必安而天下已危今宜聯人
心以固根本豈可朘削無已驅之使亂且陛下內廷積
金如山以有用之物置無用之地與瓦礫糞土何異乃

發婦之請叫鬧不應加派之議朝奏夕可臣殊不得其
解銓疏皆闕軍國安危而帝與當軸卒不省綏松敗時
謂銓有先見云熹宗即位出按遼東經畧袁應泰下納
降令銓力爭不聽曰禍始此矣天啓元年三月瀋陽破
銓請令遼東巡撫薛國用帥河西兵駐海就薊遼總督
文球帥山海兵駐廣寧以壯聲援疏甫上遼陽受圍軍
大潰銓與應泰分城守應泰令銓退保河西以圖再舉
不從守三日城破就執欲生之慰諭再四不可奪乃令

自盡銓衣冠向闕拜又遙拜父母就縊事聞贈大理卿
再贈兵部尚書諡忠烈官其子道濟錦衣指揮僉事銓
父五典歷官南京大理卿時侍養家居詔以銓所贈官
加之及卒贈太子太保初五典度海內將亂築所居實
莊為堡堅甚崇禎四年流賊至五典已歿獨銓妻霍氏
在衆請避之曰避賊而出家不保出而遇賊身更不保
等死耳盍死於家乃率僮僕堅守賊環攻四晝夜不克
而去副使王肇生名其堡曰夫人城鄉人避賊者多賴

以免道濬既官錦衣以忠臣子見重屢加都指揮僉事
僉書衛所顧與閹黨楊維垣等相善而受王永光指攻
錢龍錫成基命等為公論所不予尋以納賄事敗戍鴈
門流賊起山西巡撫宋統殷檄道濬軍前贊畫道濬家
多壯丁能禦賊崇禎五年四月賊犯沁水寧武守備猛
忠戰死道濬遣遊擊張瓚馳援賊乃退八月紫金標老
回回八金剛等以三萬衆圍寶莊謀執道濬以脅巡撫
道濬屢敗賊賊乃欲因道濬求撫紫金標請見免胄前

曰我王自用也誤從王佳允至此又一人跽致辭曰我
宜川廩生韓廷憲為佳允所獲請誓死奉約束道濬勞
遣之而陰使使昭廷憲圖賊賊至舊縣守約不動廷憲
日甚紫金標就款未決官軍襲之賊怒尤廷憲遂敗約
南突濟源陷溫陽九月廷憲知紫金標疑已思殺之以
歸約道濬伏兵沁河以待道濬遣所部劉偉佐之是夕
賊攻諸生蓋汝璋樓掘地深丈餘樓不毀賊怒誓必拔
鷄鳴不得間廷憲知事且洩偕偉倉卒奔賊追之及河

伏起殺追者滾山虎等六人皆賊腹心也賊臨沁河索
廷憲寶莊東面河道濬潛渡上流繞賊後大噪賊駭遁
去未幾官軍扼賊陵川師潰道濬據九仙臺以免十二
月廷憲知紫金樑亂世王有隙縱謀遺書間之亂世王
果疑遣其弟混世王就道濬乞降時統殷以失賊罷許
鼎臣來代主進討道濬權詞難之曰斬紫金樑以來乃
得請混世王怏怏去賊衆遂分部掠諸郡縣明年三月
官軍躡賊自陽城而北道濬設伏三纏四禽賊渠滿天

星等巡撫鼎臣奏道濬功第一八月賊陷沁水沁水當賊衝去來無時道濬倡鄉人築堡五十四以守賊五犯皆却去至是乃陷道濬率家衆三百人馳赴擊賊賊退徙十五里道濬收散亡捕賊衆傾家困以餉副使王肇生列狀上道濬功道濬故得罪清議冀用軍功自湔祓而言者劾其離伍冒功巡按御史馮明珍覆劾謂沁城既失不可言功乃更戍海寧衛

何廷魁字汝謙山西威遠衛人萬曆二十九年進士授

涇縣知縣調寧晉遷刑部主事歷歸德衛輝河南知府
西寧副使坐考功法復為黎平知府會遼事棘遷副使
分巡遼陽袁應泰納降廷魁爭不聽及瀋陽破同事者
遣孥歸廷魁曰吾不敢為民望

大清兵渡濠廷魁請乘半濟急擊之俄薄城圍未合又
請盡銳出禦應泰並不從遼陽破廷魁懷印率其妻高
氏金氏投井死婢僕從死者六人都司徐國全聞之亦
自經公署事聞贈光祿卿再贈大理卿賜祭葬諡忠愍

世廕錦衣百戶國全贈恤如制

高邦佐字以道襄陵人萬歷二十三年進士授壽光知縣教民懇荒招集流亡三千家歷戶部主事員外郎遷永平知府濬灤河築長堤裁抑稅使高淮不敢大橫遷天津兵備副使平巨盜董時耀轉神木參政屢破套寇沙津以嫡母憂歸補薊州道坐調兵忤主者意被劾歸天啓元年遼陽破起參政分守廣寧以母年八十餘涕泣不忍去母責以大義乃行熊廷弼王化貞構隙邦佐

知遼事必敗累乞歸方報允而化貞棄廣寧逃衆謂邦
佐既請告可入關邦佐叱曰吾一日未去則一日封疆
臣也將安之夜作書訣母策騎趨右屯謁廷弼言城中
雖亂外尚未知亟提兵入城斬一二人心自定公即
不行請授邦佐兵赴難廷弼不納偕化貞並走邦佐仰
天長嘆泣語從者曰經撫俱逃事去矣松山吾守地當
死此汝歸報太夫人遂西向拜闕復拜母解印綬自經
官舍僕高永曰主死安可無從者亦自經於側事聞賜

祭葬贈光祿卿再贈太僕卿謚忠節世廕錦衣百戶邦
佐與張銓何廷魁皆山西人詔建祠宣武門外顏曰三
忠同時顧願以右參政分守遼海道廣寧之變力屈自
經贈太僕少卿世廕本衛副千戶

崔儒秀字倣初陝州人萬厯二十六年進士厯戶部郎
中遷開原兵備僉事時開原已失儒秀募壯士携家辭
墓行經畧袁應泰以兵馬甲仗不足恃為憂儒秀曰恃
人有必死之心耳應泰深然之遼陽受圍分守東城矢

集如雨不少却會兵潰儒秀痛哭戎服北向拜自經事
聞賜恤視何廷魁賜祠曰愍忠以陳輔堯段展配祀輔
堯揚州人萬厯中舉於鄉厯永平同知轉餉出關與自
在知州段展駐瀋陽天啓元年日暈異常展牒應泰言
天象示警宜豫防踰月瀋陽破展死之輔堯方奉命印
烙左右以無守土責勸之去輔堯曰孰非封疆臣何去
為望闕拜拔刀自剄與展並贈按察僉事輔堯官膠州
時有覬山繭者受而懸之公帑中展涇陽舉人

鄭國昌邠州人萬厯三十五年進士歷山西參政崇禎元年以按察使治兵永平遷山西右布政使上官奏留之三月正月

大清兵自京師東行先使人伏文廟承塵上主者不覺也初四日黎明登城有守將左右之國昌覺其異極之至死須臾北樓火發城遂破國昌自縊城上中軍守備程應琦從之應琦妻奔告國昌妻與之偕死知府張鳳奇推官盧成功盧龍教諭趙允殖副總兵焦延慶東勝

衛指揮張國翰及里居中書舍人廖汝欽武舉唐之俊
諸生韓洞原周祚新馮維京胡起鳴胡光奎田種玉等
十數人皆死國昌鳳奇一門盡死事聞贈國昌太常卿
鳳奇光祿卿並賜祭奠廕一子成功等贈恤有差鳳奇
陽曲人起家鄉舉

党還醇字子貞三原人天啟五年進士授休寧知縣有
善政以父憂歸崇禎二年服闋起官良鄉十二月

大清兵薄城督吏民來城拒守或言縣小無兵盍避去

還醇毅然曰吾守土吏也去將安之救兵不至力屈城破與教諭安上達訓導李廷表典史史之棟驛丞楊其禮並死焉事定父老覓還醇屍得之草間赤身面縛體被數鎗羣哭而殮之上達貴州安順人萬厯末年舉於鄉謁選得教諭至是闔門死難事聞贈還醇光祿丞予祭葬有司建祠官其一子之棟等亦贈卹給驛歸其喪已而吏科上言還醇城亡與亡之死靡貳猶曰有守土責也上達之棟等微員末秩亦能致命遂志有死無隕

宜破格褒崇以為世勸朝廷必不惜今日之虛名作將來之忠義乃僅贈國學教職良鄉主簿於聖主優卹之典謂何帝感其言下部更議乃贈上達廷表五經博士與之棟等及千戶蕭如龍何秉忠百戶李廕並配祀還醇祠武舉陳蠡測諸生梅友松等十五人烈婦朱氏等十七人並建坊旌表順天府尹劉宗周以上達得死難之正請贈翰林宮坊不報是時列城以死事聞者更有香河知縣任光裕灤州知州楊燠光裕贈卹如還醇燠

贈光祿少卿並任一子

李獻明字思皇壽光人崇禎元年進士授保定推官明年十一月

大清兵臨遵化巡撫王元雅與推官何天球遵化知縣徐澤及先任知縣武起潛等憑城拒守時獻明以察核官庫駐城中或謂此邑非君所轄去無罪獻明正色曰莫非王土安敢見危避難請守東門城破死之元雅太原人為巡撫數月即遇變自縊死天球以永平推官理

遵化軍餉澤字兑若襄陽人獻明同年進士泣任七日
與天球起潛並殉難起潛字用潛進賢人天啓五年進
士初為武清知縣有諸生為人所訐納金酒甕以獻起
潛召學官及諸生貧者數人置甕庭中謂之曰美酒不
可獨享與諸生共之酒盡金見其人惶恐請罪即以金
分畀貧者治縣一年有聲調繁遵化坐事被劾解官候
代遂及於難巡撫方大任論畿輔諸臣功罪因言元雅
有失城罪而一死節槩凜然足以蓋愆樞輔孫承宗請

卹殉難諸臣亦首元雅帝贈獻明天球光祿少卿澤光祿丞俱廕一子元雅以大吏失城贈卹不及

張春字泰宇同州人萬厯二十八年舉於鄉厯刑部主事勵操行善談兵天啟二年遼東西盡失廷議急邊才擢山東僉事永平燕建二路兵備道時大軍屯山海關永平為孔道士馬絡繹關外難民雲集春運籌有方事就理而民不病累轉副使參政仍故官七年哈喇沁部長汪薩本者擁衆窺桃林口春督守將禽三人薩本叩

關願受罰春等責數之誓不敢叛崇禎元年改關內道
兵部尚書王在晉惑浮言劾春嗜殺一日梟斬十二人
春具揭辨關內民亦為訟寃在晉復劾其通奄剋餉遂
削籍下法司治督師袁崇煥言春廉惠不聽御史李炳
言春疾惡過甚為人中傷夫殺之濫否一勘即明乞免
提問不從明年法司言春被劾無實乃釋之三年正月
永平失守起春永平兵備參議春言永平統五縣一州
今郡城及灤州遷安並失昌黎樂亭撫寧又關內道所

轄臣寄跡無所當駐何城臣以兵備名官而實無一兵
操空拳入虎穴安能濟事乞於赴援大將中救一人與
臣同事臣亦招舊日義勇率之自效臣身已許此城不
敢少規避但必求實濟封疆此臣區區之忠所以報聖
明而盡臣職也因言兵事不可預洩乞賜陞見面陳方
畧帝許之既入對帝數稱善進春參政已而偕諸將收
復永平諸城論功加太僕少卿仍涖兵備事候巡撫缺
推用時已擢起家者多授節鉞而春獨需後命以無援

於朝也永平當兵燹之餘閭閻困敝春盡心撫卹人益懷之四年八月

大清兵圍大凌河新城命春監總兵吳襄宗偉軍馳救九月二十四日渡小凌河越三日次長山距城十五里大清兵以二萬騎來逆戰兩軍交鋒火器競發聲震天地春營被衝諸軍遂敗襄先敗春復收潰衆立營時風起黑雲見春命縱火風順火甚熾天忽雨反風士卒焚死甚衆少頃雨霽兩軍復鏖戰偉力不支亦走春及參

將張洪謨楊華徵遊擊薛大湖等三十三人俱就執部卒死者無算諸人見我

太宗文皇帝皆行臣禮春獨植立不跪至晚遣使賜以珍饌春曰忠臣不事二君禮也我若貪生亦安用我遂不食越三日復以酒饌賜之感

太宗文皇帝恩始一食令薙髮不從居古廟服故衣冠迄不失臣節而死初襄等敗書聞以春守志不屈遙遷右副都御史恤其家春妻翟聞之慟哭六日不食自縊死

當春未死時我

大清有議和意春為言之於朝朝中譁然詆春誠意伯
劉孔昭遂劾春就降不忠乞削其所授憲職朝議雖不
從而司繫其二子死於獄

閻生斗字文瀾汾西人由歲貢生歷保安知州

大清兵入保安生斗集吏民固守城破就執死之判官

李師聖吏目王本立訓導張文魁亦同死時崇禎七年
七月也八月入靈邱知縣蔣秉采募兵堅守力屈衆潰

投繯死合門殉之守備于世奇把總陳彥武馬如另典
史張標教諭路登甫並鬪死事聞贈生斗太僕少卿餘
贈恤如制東采字衷白全州舉人

王肇坤字亦資蘭谿人崇禎四年進士除刑部主事改
御史初流賊破鳳陽疏言兵驕將悍之弊請假督撫重
權大將犯軍令者便宜行戮得旨申飭而已出巡山海
居庸二關九年七月

大清兵入喜峯口肇坤激衆往禦不敵退保昌平受圍

與守陵太監王希忠總兵官巢丕昌戶部主事王一桂
趙悅攝知州事保定通判王禹佐分門守有降丁二千
為內應城遂破肇坤被四矢兩刃而死丕昌出降一桂
悅禹佐希忠及判官胡惟忠吏目郭永學正解懷亮訓
導常時光守備咸貞吉皆死之禹佐子亦從父死一桂
黃岡舉人督餉昌平以南城最衝身往扼之俄西城失
守就執死妻妾子女暨家衆二十七人悉赴井死悅以
公事赴昌平遂遇難未幾

大清兵攻順義知縣上官蓋字忠赤曲沃人起家鄉舉
廉執有聲在官三年薦章十餘上與遊擊治國器都指
揮蘇時雨等拒守城破蓋自經國器時雨及訓導陳所
蘊皆死尋破寶坻知縣趙國鼎主簿樊樞典史張六師
訓導趙士秀皆死國鼎山西樂平人鄉試第一崇禎七
年進士定興破教諭灤州熊嘉志殉節死安肅破知縣
臨清鄭延任與妻同殉教諭靈壽耿三麟亦死之事聞
贈肇坤大理卿子祭葬官一子一桂悅並贈太僕少卿

廕子祭葬餘贈恤如制

孫士美青浦人由鄉舉授舒城教諭崇禎八年春賊來犯縣令以公事出士美代守七十餘日城以全明年擢知深州十一年冬

大清兵至力守三日城破自剄於角樓父訥亦自縊一家死者十三人贈太僕少卿訥亦被旌是時畿輔諸郡悉被兵長吏多望風遁失城四十有八任邱白慧元慶都黃承宗靈壽馮登龍文安王鑰蠡縣王采新河崔賢

鹽山陳誌故城王九鼎皆以殉難聞他若青縣張文煥
興濟錢珍慶雲陳緘城破見殺教官死難者則有劉廷
訓張純儒唐一中鄉官則喬若雯李禎宁最著而棄城
者吳橋知縣李綦隆等十人皆坐死白慧元青澗人崇
禎七年進士居官善祛蠹吏民畏之九年以守城功命
減俸行取會與大閱有隙撫其罪於帝逮治之未行
大兵已抵城下乃與代者李廉仲共守無何廉仲縋城
遁慧元躬擐甲冑防禦甚力及城破一門俱死贈僉事

鄉官李禎字萬厯三十八年進士歷山西按察使罷歸
佐慧元拒守城破率家衆格鬪身中數槊而死一門從
死者數人承宗未詳何許人馮登鰲膚施舉人其從父
大緯為蠡縣訓導亦死王鑰武功舉人王采澤州人進
士崔賢弋州舉人誌九鼎亦未詳何許人誌自經死九
鼎戰死城上各贈卹有差劉廷訓順天通州人歲貢生
為吳橋訓導崇禎十一年

大清兵入畿內知縣李綦隆欲遁廷訓止之與共守外

圍將合綦隆總城走廷訓急趨城上語守者曰守死逃亦死盍死於守為忠義鬼乎衆泣諾乃堅拒三晝夜廷訓中流矢束胸力戰又中六矢乃死踰月其子啟棺更殮面如生張純儒新安人為臨城訓導率諸生共守城城破死之唐一中全州人為鉅鹿教諭抗節死

喬若雯臨城人萬厯四十七年進士授中書舍人遷禮部主事崇禎元年春廷臣爭擊魏忠賢黨若雯亦兩疏劾兵部侍郎秦士文御史張訥智鋌備列其傾邪狀尋

言故輔魏廣微罪惡滔天致先帝冒桓靈之名罪不下
忠賢其徒陳九疇張訥智鋌為之鷹犬專噬善類罪不
下彪虎乞死者削其官階生者投之荒裔帝責其詆毀
先帝而九疇等下所司行遣若雲尋改吏部遷員外郎
出為兗州知府剔除積弊豪猾斂手以疾歸士民遮道
泣送及城陷若雲端坐按劍以待遂見殺時鄉官李崇
德董祚魏克家並以城亡殉難崇德青縣人祚隆平人
克家高陽人皆舉人崇德歷戶部員外郎祚未仕克家

為鄒平知縣有善政若雲贈太常少卿餘贈恤有差

張秉文字含之桐城人祖淳官叅政事具循吏傳秉文
舉萬曆三十八年進士歷福建右叅政與永海寇李魁
奇崇禎中歷廣東按察使右布政使調山東為左十一
年冬

大清兵自畿輔南下本兵楊嗣昌檄山東巡撫顏繼祖
移師德州於是濟南空虛止鄉兵五百萊州援兵七百
勢弱不足守巡按御史宋學朱方行部章邱聞警馳還

與秉文及副使周之訓翁鴻業參議鄧謙鹽運使唐世熊等議守城連章告急於朝嗣昌無以應督師中官高起潛擁重兵臨清不救大將祖寬倪寵等亦觀望

大清兵尋下州縣十有六遂臨濟南秉文等分門死守晝夜不解甲援兵竟無至者明年正月二日城潰秉文擐甲巷戰已被箭力不能支死之妻方妾陳並投大明湖死學朱之訓謙世熊及濟南知府苟好善同知陳虞孚通判熊烈獻歷城知縣韓承宣皆死焉德王由樞就

執秉文贈太常寺卿之訓謙光祿卿承宣光祿少卿皆
建特祠餘贈卹如制學朱死不得屍疑未實獨格不予
福王時贈大理卿鴻業及推官陸燦不知所終贈卹亦
不及學朱字用晦長洲人崇禎四年進士為御史嘗抗
疏劾楊嗣昌田維嘉時論壯之之訓黃岡人進士累官
浙江按察使坐事貶官被薦未擢而購難望闕再拜與
妻劉偕死閹門殉之謙孝感人進士戰於城上與季父
有正偕死母莫氏匿民間不食死族戚僉從死者四十

餘人世熊灌陽舉人分守西門見殺好善醴泉人進士
虞孕未詳烈獻黃陂貢生城破與二子俱死承宣大學
士曠孫進士與妻妾同死有劉大年者江西廣昌人官
兵部主事奉使南京還朝道歷城城破抗節死贈光祿
少卿時

大清兵所破州縣守令失城者皆論死而臨邑宋希堯
博平張列宿荏平黃建極武城李承芳邱縣高重光皆
以死節蒙贈卹重光字秀恒保定人由貢生為柏鄉訓

導率蒼頭擊盜以全城遂擢為令及

大軍至吏民欲負之逃重光不可抱印赴井死其縉紳
殉難者恩縣李應薦天啓時官御史以附魏忠賢麗名
逆案至是捐貲募士佐有司力守城城破身被數刃而
死厯城劉化光與子漢儀先後舉於鄉父子俱守城力
戰死贈恤有差

顏孚紹字賡明曲阜人復甦六十五代孫也崇禎四年
進士厯知鳳陽江都邯鄲遷真定同知守城勦寇有功

十五年擢河間知府比歲大饑死亡載道寇盜充斥拊循甚至閏十一月

大清兵至與參議趙珽同知姚汝明知縣陳三接等堅守援兵雲集率逗遛孕紹知城必破豫集一家老稚於室中積薪繞之而身往城上策戰守城破趨歸官舍舉火焚室衣冠北向再拜躍入火中同死珽字秉珪慈谿人崇禎元年進士知南安候官二縣屢遷河間兵備僉事一門十四人悉被難汝明夏縣人天啓初舉於鄉性

孝友崇禎間歲大祲傾廩振濟立義塚瘞暴骨投蠹縣
知縣聞鄉邑又饑貽書其子令振救如初後官河間與
妾任同死三接文水人舉崇禎六年鄉試知河間縣歲
旱饑人相食三接至雨即降有疑獄數年不決至即決
之妻武氏賢三接見封疆多故遣之歸答曰夫死忠妻
死節分也三接巷戰死武從之珽贈太僕卿孕紹光祿
卿汝明三接並僉事有周而淳者掖縣人由進士拜兵
科給事中與同官六人分督畿輔諸郡城守事而淳甫

至河間城即受圍遂與諸臣同死贈太常少卿先是

大兵入霸州兵備副使趙煇知州丁師義里居參政李
時堯等督士民固拒援軍不至城遂破煇整冠帶自盡
子琬同死師義時堯皆死之煇字黃如河津人崇禎七
年進士贈光祿卿師義字象先楚雄人選貢生贈參議
時堯進士累官參政贈太常卿

吉孔嘉洋縣人幼時愬父寃於巡按御史獲釋以孝稱
舉崇禎三年鄉試授寧津知縣蠲繁苛除寇賊闔邑頌

德累遷順德知府十五年冬

大清兵臨城與鄉官知府傅梅中書舍人孟魯鉢張鳳
鳴募兵悉力拒守力屈城破孔嘉與妻張長子惠迪次
子婦王俱死贈太僕少卿妻子皆獲旌梅邢臺人萬歷
十九年舉於鄉除知登封有善政遷刑部主事治張差
梃擊案事別見死贈太常少卿魯鉢工部主事時以守
城殉難者有王端冕字服先江陵舉人知趙州以廉惠
得民城破就執死之教諭陳廣心元城人起家乙榜城

將破衣冠危坐諸子環泣請避厲聲曰吾平生所學何事豈為兒女戀戀耶遂見殺訓導王一統成安人居家多義行死節明倫堂唐鉉字節玉睢州人崇禎七年進士歷定州知州死之高維岱昌邑人舉於鄉知永清縣視事甫旬餘即遇變一門死之典史李時正教諭卹養性鄉官劉維憲同死清豐破教諭曹一貞訓導董調元皆死鄉官吏部郎中李其紀黃州推官侶鶴舉富陽知縣杜斗愚亦死之而南樂監生鄭獻書河間襄陽知縣

賈太初永年山東副使申為憲皆抗節死鉉贈右參議
維成僉事餘贈恤有差

邢國璽長葛人崇禎七年進士授濰縣知縣改建石城
盡心民事時帝以修城郭練民兵儲糗糧備戎器四事
課天下有司率視為具文惟國璽奉行如詔上官交薦
遷戶部主事運道梗於盜有議開膠萊河者國璽力陳
其便擢登萊兵備僉事經度河道十五年畿輔戒嚴部
檄徵山東兵入衛國璽監督至龍岡猝遇

大清兵部卒驚懼欲竄國璽叱止之身先搏戰矢刃交
加墮馬死撫按不奏帝降旨嚴責乃具聞贈恤如制時
大兵下山東直抵海州贛榆沐陽豐沛列城將吏或遁
或降其身死封疆者有馮守禮張日新張予卿朱迴添
任萬民等守禮猗氏人舉於鄉縣令有疑獄語訴者得
馮孝廉一刺獄即解其人懷金以告拒不聽選平定州
學正諸生兄弟爭產相訐餽以金守禮嚴却之勸以友
悌感悟去厯遷知萊蕪縣城破與二子據奇拱奇並自

殺日新浙江建德人由歲貢為訓導遷齊東教諭見海
內寇起與諸生講藝習射招土寇安守夏降之及齊東
受圍與守夏登陴守力屈及子光裔死之妻方氏自刎
守夏亦從死予卿知信陽城陷殉難迴添者瀋陽宗室
也居潞安由宗學貢生為鄒平知縣城失全節以死萬
民陽曲諸生見鄉郡被寇草救時八議守城十二策獻
之當事果得其用以保舉授武城知縣在職三年有能
聲竟殉城死又文昌時全州舉人知臨淄縣以廉慎得

民及

大清兵東下城受圍與訓導申周輔共守城破舉家自
焚周輔亦殉難同時壽光知縣李耿大興人崇禎中進
士自縊城上吳良能遼東蓋州人舉於鄉知滕縣城將
破盡殺家屬拜母出力戰死吳汝宗寧洋人知東阿城
失守死之周啓元黃岡舉人知高苑縣城破朱衣坐堂
上死之劉光先未詳里居知豐縣

大兵二千騎營西城外不攻夜一人自營逸出語城上

人曰得梯即攻不信又有逸者曰梯成立攻矣婦人亦自營出曰盡甲矣昧爽突攻西南陬方力禦已登西北陬光先殉焉劉士璟亦不知何許人知沭陽有強幹聲竭力捍城城破死之贈山東僉事

張振秀臨清人萬曆三十八年進士知肥鄉永平遷兵部主事泰昌元年改吏部更歷四司至文選員外郎乞假歸崇禎改元起驗封郎中歷考功文選擢太常少卿坐事落職歸崇禎十五年

大清兵圍河間遠近震恐臨清總兵官劉源清偕樵關
主事陳興言同知路如瀛判官徐應芳吏目陳翔龍在
籍兵部侍郎張宗衡員外郎邢泰吉臨汾知縣尹任及
振秀等合力備禦未幾城受圍力拒數日援不至城破
並死之興言南靖人如瀛陵川人應芳臨川人翔龍蕭
山人泰吉任皆進士宗衡自有傳源清澤清弟贈太子
少保其時城破殉難者壽張王大年曹州楚煙滕縣劉
弘緒數人大年舉進士歷御史加太僕少卿以附魏忠

賢名挂逆案至是盡節死煙舉進士歷戶部主事解職歸及城失守力抗子鳳苞以身翼之皆見殺妻趙觸柱死弘緒歷車駕郎中遇變死

鄧藩錫字晉伯金壇人崇禎七年進士歷南京兵部主事十五年遷兗州知府甫抵任已聞

大清兵入塞亟繕守具未幾四萬騎薄城下藩錫走告魯王曰郡有吏國有王猶同舟也列城失守皆由貴家惜金錢而令寡人餓夫列陣捍禦夫城郭者我之命也

財賄者人之命也我不能畀彼以命而望彼畀我以命乎王誠散積儲以鼓士氣城猶可存不然大事一去悔無及矣王不能從藩錫與監軍參議王維新同知譚絲曾文蔚通判閻鼎推官李昌期滋陽知縣郝芳聲副將丁文明長史俞起蛟及里居給事中范淑泰等分門死守至十二月八日力不支城破維新猶力戰被二十一創乃死藩錫受縛不降見殺其妾攜穉子投井死魯王以派亦見殺昌期永年人芳聲忻州人並起家進士昌

期嘗監軍破土寇萬衆推其才芳聲治縣有聲至是皆
死起蛟錢塘人由貢生歷官魯府左長史相憲王及惠
王立欲易世子起蛟力諫乃已世子嗣位值歲凶勸王
振貸自出粟二千石佐之大盜李青山率衆來犯偕淑
泰出擊大破其衆及王被難起蛟率親屬二十三人殉
之文明亦戰死事聞贈維新光祿卿藩錫太僕少卿昌
期僉事餘贈卹有差有樊吉人者元城人由進士知滋
陽累擢山東兵備僉事未行遇變自刎死淑泰自有傳

張恨芳會稽人崇禎元年進士歷南京戶科給事中十一年春疏薦黃道周惠世揚陳子壯金光辰而為舊撫文震孟請卹帝以沽名市恩切責之又糾太僕少卿史塗為塗所訐遂罷職事具薛國觀傳十六年正月恨芳北上抵臨清遇

大清兵與諸生馬之駒之駒俱就執死之其妻妾聞之赴井死時又有天津參將賀秉鉞者泰寧左衛人崇禎四年第武科一甲第三亦以扶父柩至臨清巷戰終日

矢盡就執死

明史卷二百九十一

欽定四庫全書

明史卷二百九十一考證

張銓傳天啓元年三月瀋陽破遼陽受圍軍大潰應泰
令銓退保河西以圖再舉不從守三日城破

臣章

宗瀛按是時蒙古諸部大飢多入塞應泰乃下令招
降歸者日衆處之遼瀋二城天啓元年

大清兵攻之總兵官賀世賢等力戰敗還明日降人內應

城遂破見應泰傳謹識

就執欲生之慰諭再四不可奪乃令自盡銓衣冠向闕
拜又遙拜父母就縊舊本作被執不屈欲殺之引
頸待刃乃送歸署銓衣冠向闕拜又遙拜父母遂自
經臣章宗瀛恭讀

太祖高皇帝實錄天命六年張銓被執不降

太祖命賜死以遂其志

太祖惜銓欲生之婉諭再四終不可奪不得已縊而葬之

此傳所載小誤謹据改

崇禎四年流賊至

臣章宗瀛按是時賊趙四兒六千

餘人入山西即點橙子也總督洪承疇等擒斬之見

通鑑紀事謹附攷

高邦佐傳裁抑稅使高淮不敢大橫

臣章宗瀛按遼

東稅監高淮恃寵恣橫吏民小拂意係累相屬於道

二十六年欲變錦州倉卒逃入關吏部侍郎楊時喬

等力言遼東重困危在旦夕皆淮授民激變乃召還

見通鑑紀事謹附攷

顧頤以右參政分守遼海道

臣

章宗瀛按顧頤博興

人萬厯中進士見山東通志謹附攷

張春傳復以酒饌賜之 舊本此下有春仍不食守者

懇勸二語

臣

章宗瀛恭讀

太宗文皇帝實錄載

上賜以珍饌張春曰我死志已決不食

上之所賜我盡忠求死殺之以成我志

上益有令名矣日後

上之諸臣必有為

上盡忠而死者不食餓三日

上復賜食乃受而食之並無春仍不食守者懇勸二語傳
所載誤謹擬刪

王肇坤傳遊擊治國器

臣

章宗瀛按畿輔通志治國

器作治國器萬姓通譜有治姓而無治姓治字係治
字之誤謹据改

定興破安肅破

臣

章宗瀛按此處既夾叙閒文即與

上段文氣不相貫注舊本破定興破安肅應作定興
破安肅破辭意方順謹改

故城王九鼎

臣

章宗瀛按明統志河間府有故城而

無固城固字誤謹据改

承宗未詳何許人

臣

章宗瀛按黃承宗威海衛人城

破興子朝鑑力戰中流矢死妻劉氏自縊死見山東
通志謹附攷

九鼎亦未詳何許人

臣

章宗瀛按王九鼎潛山人見

江南通志謹附攷

虞孕未詳

臣

章宗瀛按陳虞孕雲南昆明籍上元人

見江南通志謹附攷

明史卷二百九十一考證

附明史卷二百九十一考證後

乾隆四十一年

賜謚諸臣

王肇坤 王一桂 李禎宁 喬若雯 宋學朱

顏紹孕 吳良能

以上通謚忠烈

張秉文 吉孔嘉 鄧藩錫 張焜芳

以上通謚忠節

鄭國昌 陳輔堯 張鳳奇 党還醇 楊燦

孫士美 劉廷訓 鄧謙 趙珽 陳三接

高維岱 李其紀 文昌時 陳與言 王維新

丁文明 樊吉人 賀秉鉞

以上通謚烈愍

竇永澄 江萬春 董爾礪 徐國全 顧頤

崔儒秀 段展 程應琦 盧成功 焦延慶

張國翰 廖汝欽 任光裕 李獻明 王元雅

何天球 徐澤 武起潛 張春 閻生斗

蔣秉采 于世奇 趙悅 王禹佐 咸貞吉

上官蓋 治國器 蘇時雨 趙國昂 鄭延任

白慧元 黃承宗 馮登黿 王鑰 王采

崔賢 陳誌 王九昂 張文煥 錢珍

陳絨 李崇德 魏克家 周之訓 翁鴻業

唐世熊 苟好善 陳虞孕 熊列猷 韓承宣

陸燦 劉大年 宋希堯 張列宿 黃建極

李承芳 高重光 姚汝明 周而淳 趙輝

丁師義 李時芑 孟魯鉢 張鳳鳴 王端冕

唐鉉 李鶴舉 杜斗愚 賈太初 申為憲

傅梅 邢國璽 馮守禮 張子卿 朱迴添

任萬民 李耿 吳汝宗 周啟元 劉光先

劉士璟 張振秀 劉源清 邢泰吉 尹任

楚烟 劉宏緒 譚然 曾文蔚 閻鼎

李昌期 郝芳聲 俞起蛟

以上通諡節愍

欽定四庫全書

明史卷二百九十二

大學士張廷玉等奉 敕修

列傳第一百八十

忠義四

張允登

郭景嵩
郭應響

張光奎

楊于楷等

李中正

馬足輕等

方國儒

王紹正 常存
畏 劉定國

何承光

高日臨等

龐瑜

董三謨等

尹夢龍

趙士寬等

盧謙

張有俊等

龔元祥

子炳衡
姚允恭

王信

史記言

李君賜等

梁志仁

單思仁等

王國訓

胡爾純等

黎弘業

馬如蛟等

張紹登

張國勛等

王燾

魏時光

蔣佳徵

吳暢春等

徐尚卿

王時化等

阮之鈿

郝景春

子鳴鑾等

張克儉

鄺日廣等

徐世淳

子肇梁
金塢等

張允登漢州人萬曆三十八年進士歷知寧陽咸陽有
善政其成進士出湯賓尹之門賓尹弗善也而東林以
賓尹故惡之舉卓異得刑部主事累遷河安兵備副使
廊延歲飢亟遭盜允登拊循備至士民德之崇禎四年
閏十一月督餉至甘泉降卒潛與流賊通賊知縣郭永
固劫餉允登力禦不敵死廊人素服迎其喪哭聲震十
里罷市三日當是時流賊日熾總督洪承疇往來奔擊
日不暇給逾月陷宜君又陷葭州僉事郭景嵩死之明

年二月陷鄜州兵備副使郭應響死之響係福清人萬
厯丙午舉鄉試第一寧塞餘賊來犯應響禦之斬賊常
山虎等十五人至是混天猴率衆夜突至應響登北闕
集士卒拒守手殺三賊力不支遂死事聞贈光祿寺少
卿謚忠烈予祭葬廕一子入監讀書

張光奎澤州人仕至山東右叅政崇禎五年流賊躡山
西監司王肇生以便宜署歙人吳開先為將使擊賊戰
澤州城西賊敗去從心水轉掠陽城開先恃勇渡沁戰

北留墩下擊斬數百人礮盡無援一軍盡沒賊乃再犯
澤州光奎方里居與兄守備光璽千總劉自安等率衆
固守八日援兵不至城陷並死之澤大州也遼近為震
動事聞贈光祿卿光璽等贈恤有差是歲紫金梁等寇
遼州里居行人楊于楷與主事張友程佐知州信陽李
呈章拒守力屈城陷於楷被執罵賊死呈章友程及舉
人趙一亨侯標並死之明年六月賊陷和順里居昌平
副使樂濟衆被傷不屈投井死贈於楷光祿少卿濟衆

太僕少卿有徐明揚者浮梁人由選貢生為平順知縣
六年四月賊來犯設策守禦城破不屈死

李中正盧氏人萬厯末舉會試以天啟二年赴廷對授
承天府推官遷兵部主事崇禎初謝病歸六年羣盜大
亂河北其冬承化渡河遂由澠池犯盧氏中州承平久
不設備驟聞賊至吏民皇駭知縣金會嘉棄城遁十二
月賊入城中正勒家衆及里中壯士奮擊衆寡不敵力
戰死賊縱掠城中執舉人靳謙書使跪不屈大罵而死

賊以是冬始入河南自是屢陷名城殺將吏無算鄉官
舉貢多被難其宜陽馬足輕靈寶許輝新安劉君培馬
山李登英偃師裴君合陝州張我正張我德孟澤孫挺
生嵩縣傅齊世李佩玉上蔡劉時寵輩則先後以布衣
抗節顯足輕性孝友弟惑婦言迫分產乃取田磽薄者
自予萬厯末歲大凶出粟六百石以振焚券千餘宗禎
六年冬流賊渡河而南挈眷避之石龍崖三女皆殊色
慮賊汚悉投崖死足輕被執厲聲大罵賊怒并三子殺

之家衆皆遇害惟存次子駿一人後登鄉薦輝為縣陰陽官為賊所掠大罵見殺君培有義行攜子及從孫避難道遇賊欲賊其從孫君培曰我尚有男此子乃遺孤幸舍之而殺我賊如其言二子獲免山性剛直土寇于大中陷新安獲山使負米叱曰我天朝百姓肯為賊負米耶大罵而死登英亦以罵賊死君合幼孤母苦節孝養惟謹賊至聚衆保沙岸寨攻圍十晝夜不克說之降大罵不從寨破被磔我正素豪俠集衆保鄉里一方賴

之十四年勒衆禦賊馘三人俄賊大至衆悉奔奮臂獨
戰賊愛其勇欲生致之詬罵自刎死我德知賊至恐妻
子受辱驅一家二十七人登樓自焚挺生精星術預卜
十五年有寇禍編茅渚河以居賊蹤跡得之語其妻梁
氏曰此匹夫狗義之秋也夫婦對泣詬面而死世濟與
兄世舟並為土寇於大中所執將殺之兄弟相抱泣賊
議釋其一世濟即奪賊刀自殺世舟獲免佩玉者御史
興元孫也崇禎末中州盡殘佩玉結遺民捍鄉井與鄰

寨相倚角往往尾賊後奪其輜重賊憚之不敢出其境
後大舉圍別寨佩玉往救力戰而死里人聚哭之時寵
有孝行賊陷城其父宗祀以年老不能行命之速避遂
自殺時寵慟哭刺殺一子三女夫婦並自剄其妹適歸
寧亦從死一家死者八人

方國儒字道醇歙縣人四歲失父奉母以孝聞天啟元
年舉於鄉崇禎間授保康知縣流賊大入湖廣將吏卒
保風先奔保康小邑素無兵七年正月賊至國儒急率

鄉兵出禦力不支城遂陷亡何賊退國儒還入城踰月
復至督吏民固拒賊至益衆復陷國儒官服坐堂上被
執大罵身中七刃死賊陷竹溪訓導王紹正死之穀城
舉人常存畏會試赴京道遇賊欲劫為首領罵不絕口
死他賊犯興山知縣劉定國堅守城將陷遣吏懷印送
上官罵賊死

何承光貴州鎮遠人萬厯四十年舉於鄉崇禎中厯夔
州同知七年二月賊由荊州入夔門犯夔州副使周士

登在涪州城上倉猝無備通判推官知縣悉遁承光攝
府事率吏民固守力竭城陷承光整冠帶危坐賊入殺
之投屍於江事聞贈承光夔州知府自賊起陝西轉寇
山西畿輔河南北及湖廣四川陷州縣以數十計未有
破大郡者至是天下為震動其他部自漢中犯大寧知
縣高日臨見勢弱不能守齎指書牒乞援上官率衆禦
之北門兵敗被執大罵不屈賊碎其體焚之訓導高錫
及妻女巡檢陳國俊及妻皆遇害日臨字嚴若鄱陽恩

貢生賊陷夔州他賊即以次日陷巫山通江巡檢郭纘
化陣沒通江指揮王永年力戰死至四月守備郭震辰
指揮田實擊賊百丈關兵敗被執罵賊死

龐瑜字堅白公安人家貧躬耕自給夏轉水灌田執書
從牛後朗誦不輟由歲貢生授京山訓導崇禎七年擢
陝西崇信知縣縣無城兵荒貧民止百餘戶瑜知賊必
至言於監司陸夢龍以無兵辭瑜集士民築土垣以守
流涕誓死職閏八月天大雨土垣盡圯賊掩至瑜急解

印遣家人齎送上官端坐堂上以待賊至捽令跪瑜罵
曰賊怒敢辱官長拔刀脅之罵益厲賊掠城中無所有
執至野外剖心裂屍而去贈固原知州時賊盡趨秦中
長吏多殉城者山陽陷知縣董三謨黎平舉人也及父
嗣成弟三元俱死之妻李氏亦攜子女偕死贈光祿丞
立祠與嗣成三元並祀妻女建坊旌表吉永祚輝縣人
為鳳縣主簿謝事將歸會賊至知縣棄城遁永祚倡義
拒守城陷北面再拜曰臣雖小吏嘗食祿於朝不敢以

謝事逃責大罵死之子士樞士橫皆死教諭李之蔚鄉
官魏炳亦不屈死永祚贈漢中衛經歷餘贈卹有差婁
琇知涇州閏八月城陷死贈太僕少卿蒲來知舉甘泉
賦來云守備孫士法等擁兵不救城破來舉手刃一賊
傷六賊而後死贈光祿少卿呂鳴世福建人由恩貢生
為麟遊知縣兵燹後拊居民恩城陷賊不忍以加害自
絕食七日卒有宋緒湯者耀州諸生被獲大罵死

尹夢龍雲南太和人萬曆時舉於鄉崇禎中知潁州八

年正月方謁上官於鳳陽聞流賊大至立馳還賊已抵城下乃偕通判趙士寬率民固守城北有高樓瞰城中諸生劉廷傳請先據之夢龍以為然而廷傳所統皆市人不可用賊遂據樓以攻且鑿城頽數丈城上人皆走止之不可夢龍持大刀獨當城壞處殺賊十餘人身被數刀賊衆畢登遂投城下烏龍潭死弟姪七人皆死之廷傳者故布政使九光從子任俠好義亦罵賊死九光子廷石分守西城中賊刃未絕口授友人方畧令繕牘

上當事旋卒士寬字汝良掖縣人由門廕為鳳陽通判
駐潁州以正旦詣郡城聞警一日夜馳三百里返州城
陷率家衆巷戰力竭亦投烏龍潭死妻李攜三女登樓
自焚僕王丹亦罵賊死鄉官尚書張鶴鳴弟副使鶴騰
子大同中書舍人田之潁知縣劉道遠光祿署正李生
白訓導丁嘉遇舉人郭三杰諸生韓光祖等皆死之光
祖進士獻策父也被執賊猝使跪叱曰吾生平讀書止
知忠義遂大罵賊殺之碎其屍妻武偕一妹一女並獻

策妻李赴井死妾李方有娠賊剖腹剔胎死次子定策
孫日曦罵賊死獨獻策獲存時被難者共一百三人城
中婦人死節者三十七人烈女八人潁州忠烈稱獨盛
云潁州衛隸河南流賊至指揮李從師王廷俊千戶孫
升田三震百戶羅元慶田得民王之麟俱乘城戰死賊
既陷潁州屠其民其別部卽以是月由壽州犯鳳陽鳳
陽故無城中都守留朱國相率指揮袁瑞徵呂承廕郭
希聖張鵬翼周時望李郁兵光祚千戶陳弘祖陳其忠

金龍化等以兵三千送賊上窰山多斬獲賊俄數萬至
矢集如蝟遂敗國相自刎死餘皆陣沒賊遂犯皇陵太
肆焚掠知府顏容暄囚服匿於獄釋囚獲之容暄大罵
賊杖殺之血侵石堦宛如其像滌之不滅士民乃取石
立塚建祠奉祀推官萬文英卧病賊索之子元亨年十
六泣語父曰兒不得服事親矣出門呼曰若索官何為
我即官也賊繫之顧見其師萬師尹亦被繫給賊曰若
得之者官爾何繫此賊隸賊遂釋之元亨乃極口大罵

賊怒斷脛死文英獲免容暄漳浦人文英南昌人皆進士一時同死者千戶陳永齡百戶盛可學等四十一人諸生六十六人舉人蔣思宸聞變投環死後給事中林正亨錄上其狀贈夢鰲光祿少卿士寬光祿丞餘卹典有差

盧謙字吉甫盧江人萬歷三十三年進士授永豐知縣擢御史出為江西右叅政引疾歸崇禎八年二月流賊犯盧江士民具財帛求免賊偽許之俄襲陷其城謙服

命服危坐中門賊至欲屈之罵曰吾朝廷憲臣肯為賊
屈耶輒輩滅亡在即安敢無禮賊怒殺之投屍於池池
水盡赤舉人張受畢尹周亦不屈被殺是年正月賊陷
霍邱縣丞張有俊教諭倪可大訓導何炳鄉官田既庭
戴廷對舉人王毓貞死焉賊陷巢縣知縣嚴寬被執不
屈一門皆死二月犯太湖知縣金應元據城東大濠以
守奸人導賊渡濠執應元斫之未殊自經死訓導扈永
寧亦死之謙贈光祿卿餘贈卹如制覺歸安人應元浙

江山陰人皆舉人

龔元祥字子禎長洲人舉於鄉崇禎四年為霍山教諭
厲廉隅以名教自任與訓導姚允恭友善八年賊陷鳳
陽元祥偕縣人守禦賊奄至今逸去元祥督士民固守
或勸之避元祥曰食祿而避難不忠臨危而棄城不義
吾平日講說者謂何倘不測死爾及賊陷城元祥整衣
危危坐賊至侃侃諭以大義賊欲屈之厲聲曰死即死
賊輩何敢辱我賊怒執之去罵不絕口遂遇害子炳衡

號呼罵賊賊又殺之閱五日允恭歛其屍即自縊適令
至解免越日賊復入允恭卒死之事聞贈元祥國子助
教建祠曰忠孝以其子配之恭亦被旌

王信陝西寧州人父歿廬墓三年母歿信年已六十足
不踰閭者三年崇禎初由歲貢生除靈璧訓導遷真陽
知縣八年二月出撫土寇會流賊猝至被使二諭降羅
山真陽信大罵不從斷頭剖腹而死閱四日其子來覓
猶舒指握子手贈光祿丞建祠奉祀

史記言字司直當塗人崇禎中舉人由長沙知縣遷知陝州陝當賊衝記言出私財募士聘少室僧訓練之八年冬十一月流賊犯陝記言禦之斬數十級生禽二十餘人老獍憤率數萬人攻城不克乘夜雪來襲而所練士方調他郡城遂陷記言攻火自焚兩僧掖之出曰死此何以自明乃越女牆下賊追獲之令降叱曰有死知州無降知州也遂被殺指揮李君賜殺數賊而死訓導王誠心里居教諭張敏行姚良弼指揮楊道泰阮我

疆鎮撫陳三元亦不屈死是年十月賊陷盧氏知縣白
楹自剄十年九月陷城池知縣李邁林死之記言贈光
祿少卿餘贈卹有差

梁志仁南京人保定侯銘之裔也萬厯末年舉於鄉崇
禎六年授衡陽知縣調羅田大賊湖廣志人仁日夕儆
備羅汝才謂左右曰羅田城小易克然梁君長者吾不
忍加兵俟其去當取之會邑豪江猶龍與賊通志仁捕
下獄猶龍知必死潛導汝才別校來攻八年二月猝攻

城志仁急偕典史單思仁教諭吳鳳來訓導盧大受督
民守禦城陷志仁持長矛巷戰殺六賊力屈被繫抑使
跪罵曰我天子命官肯屈膝賊輩耶賊怒碎其支體焚
之妻唐被逼大罵奪賊刀不得口齧賊手遂遇害思仁
等亦不屈死汝才在英山聞之馳至羅田斬其別校曰
奈何擅害長者以錦繡斂其夫婦屍鳳來福建舉人大
受寶慶貢生詔贈志仁蘄州知州思仁羅田主簿鳳來
國子助教大受學錄廕子祭葬有差

王國訓字振之解州人天啟二年進士歷知金鄉壽張
滋陽武清坐大計久之調補扶風國訓性剛嚴恥干進
故官久不遷崇禎八年秋賊來犯偕主簿夏建忠典史
陳紹南教諭張弘綱訓導陳縉嬰城固守閱兩月外援
不至城陷罵賊死建忠等亦不屈死贈國訓光祿少卿
建忠等皆贈卹當是時大帥曹文詔艾萬年等並戰沒
賊勢益張關中諸州縣悉殘破八月賊陷永壽殺知縣
薄匡宇尋陷咸陽殺知縣趙躋昌其時長吏以死聞者

隴州知州胡爾純自經死延長知縣萬代芳與教諭譚
恩驛丞羅文魁協力守城城陷皆死之代芳妻劉妾梁
從死爾純山東人贈光祿少卿代芳贈光仁丞妻妾建
坊旌表恩等亦賜祭有孫仲嗣者膚施人由貢生為階
州學正當時知其才委以城守賊大至盡瘁死守城破
與妻子十餘人並死之贈國子博士又有楊呈秀華陰
人由進士歷官順慶知府大計罷歸賊攻城佐有司禦
賊以死贈卹如制

黎弘業字孟擴順德人由舉人知和州崇禎八年流賊
犯和州禦却之十二月復至與鄰官馬如蛟募死士登
陴固守城將陷弘業繫印於肘跪告其母曰兒不肖貪
微官以累母奈何母李泣諭曰汝勿以我為意事至此
有死而已遂自縊妻楊妾李及女四人繼之弘業北面
慟哭再拜自刎未殊濡頭血大書曰為臣盡忠為子盡
孝何惜一死賊入傷數刀而死贈太僕少卿任一子判
官錢大用偕妻妾子婦俱死吏目景一高被創死學正

康正諫祁門人舉人偕妻汪子婦章赴水死贈國子監
丞訓導趙世選不屈死贈國子學錄馬如蛟字騰仲州
人天啟二年進士授浙江山陰知縣有清操崇禎元年
徵授御史劾罷魏忠賢黨徐紹吉張訥出按四川蜀中
奸民悉以他人田產投勢家如蛟列上十條永革其弊
還朝監武會試武舉董姓者以技勇聞於帝及入試文
不中程被黜帝怒黜考者如蛟亦落職八年論平安邦
彥功復故官以父憂未赴賊至如蛟傾貲募士佐弘業

固守麾壯士出擊兩戰皆捷賊將奔會風雪大作不辨
人色守者皆潰賊遂入城如蛟急下令能擊賊者予百
金須臾得百餘人巷戰賊多傷力屈遂戰死兄鹽運司
判官如蚪諸生如虹及家屬十四人皆死事聞贈太僕
少卿官一子

張紹登字振夫南城人崇禎中舉人知應城縣九年賊
來犯偕訓導張國勛鄉官繞可久悉力禦之國勛曰賊
不一創城不易守壯士出擊力戰一日夜有斬獲甚衆

賊去邑侍郎王城之子權結怨於黨族怨家漸導賊復來攻國勛佐紹登力守而乞上於上官副將鄧祖禹來救守西南國勛守東北紹登往來策試會賊射書索權權懼斬北関以出賊乘間登南城紹登還署端坐堂上賊至奮拳擊之羣賊大至乃被殺賊渠歎其忠以冠帶覆屍埋堂側國勛黃坡歲貢生賊既入朝服北面拜走捧先聖神主拱立以待賊遂焚文廟投國勛於烈燄中祖禹亦不屈死可久幼孤事母孝舉於鄉知大興縣崇

禎初疏請更三朝要典時奄官擅權謫光祿典簿遷應天府推官刑部主事歷知府丁艱歸賊入語妻程曰臣死忠婦死節分也於是妻女相對自經可久被執賊強之拜曰頭可斷膝不可屈也遂遇害域為賊支解事聞贈紹登尚寶少卿國勛國子學正

王燾字濬仲崑山人少孤貧九歲為人後族人有謀其產者燾舉以讓之迎養嗣祖母及母惟謹萬歷舉之於鄉由教諭歷隨州知州州經羣盜焚掠戶不滿千燾訓

民兵繕守具土寇李良喬為亂殲滅之十年正月大賊
奄至燾且守且戰擊斬三百餘人敗攻益力相持二十
餘日天大風雪守者多散燾知必敗入署整冠帶自經
賊焚其署火獨不及燾死所屍直立不仆賊望見駭走
已覓州印得之燾所立尺土下事聞贈太常少卿福王
時賜諡烈愍建雙忠祠與同邑蔡懋德並祀有魏時光
者南昌人善舞雙刀崇禎九年夏為廣濟典史邑遭殘
破長吏設排兵三百人委之教訓其冬賊據蘄州河口

憚時光不敢渡時光益募死士夜襲其營手殺數賊賊不敢逼俄賊大至部卒皆散時光單騎據高坡又殺數人賊環繞之靳斷被執不屈死其兄陳於上官却不奏兄憤發病死友人收斂之哭盡哀曰弟為國死兄為弟死吾獨不能表暴之乎具牘力陳乃奏聞贈廣濟主簿予卹典

蔣佳徵灌陽人天啟四年舉於鄉崇禎中知盱眙縣有聲縣故無城佳徵知賊必至訓民為兵十年秋賊果來

犯設伏要害親率兵往誘賊殲甚衆賊怒環攻之力戰
死母聞之亦投環死兵部議贈奉大夫尚寶少卿乃未
幾巡按御史言佳徵子忠母義宜賜謚廕以植倫常乃
建表忠祠並母奉祀同時北江死難者有吳暢春崇禎
八年為天山天堂寨巡檢練鄉兵防賊明年冬賊至夜
設燎大驚去踰年賊再至暢春死守力屈乃仰天歎曰
吾得死所矣手刃數賊被執不屈死贈迪功郎安慶府
經歷廕子所鎮撫又有王寅錢塘人膂力絕人舉武鄉

試以父征播功為千戶崇禎中擢撫標守備見步卒脆
弱詭曰曩戚將軍練浙兵聞天下今若爾邪督教之卒
始可用十年遷龍江都司調赴泗洲護祖陵賊來犯寅
曰賊衆我寡及其未集可破也捲甲疾趨至盱眙斬其
先鋒一人戰自午迄申賊來益衆與守備陳正亨陷陣
死贈鎮國將軍都指揮僉事正亨贈昭勇將軍指揮使
並官一子

徐尚卿南平人舉於鄉知劍州崇禎十年十月李自成

惠登相等以數十萬衆入四川大將侯良柱敗歿於廣
元遂攻陷昭化知縣王時化死之尚卿知賊必至集士
民泣曰城必不能守若輩速去吾死此衆泣請偕去尚
卿不可越二日城陷投環死吏目李英俊從之賊遂長
驅陷江油彰明安縣羅江德陽漢州吏目皆先遁尋掠
郫縣主簿張應奇死之陷金堂典史潘孟科死之是月
也賊陷州縣三十六以死事聞者四人事定贈尚卿右
叅議時化光祿丞應奇按察司知事孟科將仕郎並賜

卹典時化湖廣人舉鄉試第一

阮之鈿字實甫桐城諸生崇禎中下詔保舉人才同郡
諭德劉若宰以之鈿應授穀城知縣十一年正月之鈿
未至張獻忠襲陷其城據以求撫總理熊文燦許之處
其衆數萬於四郊居民洶洶欲竄之鈿至盡心調劑民
稍安乃上疏言獻忠虎踞邑城其謀叵測所要求之地
實兵餉取道咽喉秦蜀交會脈絡今皆為所據奸民甘
心效用善良悉為迫脅臣守土牧民之官至無土可守

無民可牧庫藏殫虛心產被奪無賦可徵名雖縣令實
贅員爾乃廟堂之上專主撫議臣愚妄謂撫勦二策可
合言未可分言致損國威而挫士氣時不能用賊衆漸
出野外行劫之鈿執之以告其營將稍置之法及再告
皆不應曰官司不給餉耳得餉自止由是村民徙亡殆
盡遂掠及闌闌稍拒輒挺刃相向日有死者一城大驚
監軍僉事張大經奉文燦令來鎮撫亦不能禁明年獻
忠反形漸露之鈿往說之曰將軍始所為甚悖今幸得

為王臣當從軍立功垂名竹帛且不見劉將軍國能乎
天子手詔進官厚賚金帛此赤誠效也將軍若疑天朝
有異論之鈿請以百口保何嫌何疑而復懷他志獻忠
素銜之鈿遂惡言極罵之之鈿憂憤成病題數語於壁
自誓以死遂不視事至五月獻忠果反劫庫縱囚毀其
城之鈿仰藥未絕獻忠遣使索印堅不予賊遂殺之旋
縱火焚公署骸骨為燼而大經為賊劫去不能死迨瑪
瑙山戰敗偕賊將曹威等出降士論醜之之鈿後贈尚

寶少卿

郝景春字和滿江都人舉於鄉署鹽城教諭坐事罷之
起陝西苑馬寺萬安監錄事量移黃州照磨攝黃安縣
事甫三日羣賊奄至堅守八日夜始解去崇禎十一年
擢知房縣羅汝才率九營之衆請降於熊文燦文燦受
之汝才猶豫景春單騎入其營偕汝才及其黨曰貴黑
雲祥歃血盟汝才詣軍門降分諸營於竹谿保康上津
而自與貴雲祥居房縣之野當是時鄖陽諸屬邑城郭

為墟獨房賴景春拊循粗可守及大衆雜處居民日惴
惴景春乃與主簿朱邦聞守備楊道選修守具輯諸營
明年五月張獻忠反穀城約汝才同反景春子鳴鑾諸
生也力敵萬夫謂父曰吾城當賊衝而羸卒止二百城
何以守乃環甲詣汝才曰若不念香火盟乎慎毋從亂
汝才佯諾鳴鑾覺其偽歸與道選授兵登陴而獻忠所
遣前鋒已至擊斬其將上天龍遣使縋城乞援於文燦
凡十四往不報已而賊將至獻忠兵張白幟汝才兵張

赤幟俄二幟相雜環城力攻貴雲祥策馬呼曰以城讓
我保無他也獻忠又以張大經檄諭降景春大罵碎之
鳴鑼且守且戰閱五日賊多死乃負版穴城城將崩鳴
鑼熱油灌之又擊傷獻忠左足殺其所愛善馬乃用間
入賊壘陰識獻忠所卧帳將襲禽之指揮張三錫啟北
門揖汝才入道選巷戰死大經使汝才說景春降怒不
答問庫藏儲蓄在在叱曰庫藏若有物城豈為汝陷賊
怒殺一典史一守備恐之卒不屈與鳴鑼俱被殺僕陳

宜亦死之邦聞及其家人並不屈死事聞贈景春尚寶
少卿建祠奉祀道選等亦贈卹已帝召見輔臣賀逢聖
備述其死事狀改贈太僕少卿三錫後為官軍所獲磔
死

張克儉字禹型屯留人崇禎四年進士授輝縣知縣六
年春賊犯武安守備曹鳴鶚戰死遂犯輝縣克儉乘城
固守賊不能下屯百泉書院三日而去遷兵部主事被
薦召對稱旨十二年擢湖廣僉事監鄖襄諸軍楊嗣昌

鎮襄陽深倚伏之張獻忠羅汝才之敗也小秦王混世
王過大星等皆降嗣昌處之房竹山中命克儉安輯而
諸賊得免死牌莫肯散自擇便地連營數百里時河南
北大饑流民就食襄漢者日數萬降卒多闖入流民中
克儉深憂之上書嗣昌曰襄陽自古要區本朝管鑰獻
陵眎昔尤重近兩河飢民雲集新舊降丁逼處其間一
夫叫呼即足致亂況秦兵以長武之變西歸鄖房軍府
粗立降營基置奚啻縱虎自衛紫漢西興初無重門之

備何恃不恐嗣昌不以為意執曰昔高仁厚六日降賊
百萬迄禽阡能監軍何怯也及嗣昌入蜀委克儉以留
務錄破賊功加右叅議監軍如故未幾以本官移守下
川南道鄖陽巡撫袁繼咸奏留之十四年二月擢右僉
都御史巡撫河南未聞命獻忠令人假督府軍符誑入
襄陽城克儉不能辨夜分賊從中起焚襄王府克儉倉
皇奔救為賊所執大罵死推官鄭曰廣攝縣事李大覺
游擊黎民安死焉曰廣番禺人崇禎十年進士居官有

守奉檄覆軍儲於荊州甫還任而難作中刃死妻子女俱遇害大覺字覺之金谿人由鄉舉知穀城兼署襄陽縣聞變繫印于肘縊死堂上民安大覺同縣人城中火起率所部千餘人搏戰矢盡被縛抗罵死獨知府夏邑王承曾遁免初獻忠敗于瑪瑙山其妻教氏高氏被獲他將搜山又獲其軍師潘獨鰲皆繫襄陽獄承曾年少輕佻每夕托問賊中情形與獻忠二妻笑語獄吏又多納賊金禁防盡弛獨鰲等脫桎梏恣飲嗣昌移牒戒之

承曾笑曰是豈能飛至耶及是獨鼇果從獄中起承曾率衆奪門走事聞命逮治時河南亦大亂久逮不至未知所終

徐世淳字中明秀水人父必達字德夫萬厯二十年進士知溧水縣築石曰湖隄奏徐齊泰姻戚子孫軍籍二十六家累遷吏部考功郎中與吏科給事中儲純臣同領察事純臣受賊吏賂當大計日必達進狀請黜純臣面揖之退一座大驚遷光祿丞陳白糧利弊十一事悉

允行進少卿巡漕御史孫居相以船壞不治請雇民船
運濟必達爭止之天啟初以右僉都御史督操江軍白
蓮賊將窺徐州必達募銳卒會山東兵擊破之遷兵部
右侍郎以拾遺罷歸卒世淳崇禎中舉人十三年冬歷
隨州知州州嘗被賊居民蕭然世淳知賊必復至集士
民隨以死守會歲大荒士多就食粥廠嘆曰可使士以
餒失禮乎分粟振之潰兵過隨索餉世淳授兵登陴而
單騎入見軍師曰軍食不供有司罪也殺我足矣請械

我以見督師帥氣奪斂衆去明年三月張獻忠自襄陽
來犯世淳寢食南城譙樓曉夜固守告急於巡撫宋一
鶴一鶴遣兵來援為監司守承天者邀去守月餘援絕
力窮賊急攻南城而潛兵遁北城以入世淳命子肇梁
獮印解後勒馬巷戰矢貫頤耳鼻橫斷墜馬亂刃斫死
肇梁奔赴且哭且罵賊將殺之呼州人告以獮印處乃
死世淳妾趙王及臧獲十八人皆死後贈太僕少卿建
祠以肇梁祔隨自十年正月陷及是再陷至七月復陷

判官余塙死焉三陷之後城中幾無孑遺

明史卷二百九十二

欽定四庫全書

明史卷二百九十二考證

張允登傳督餉至甘泉降卒潛與流賊通殺知縣郭永固劫餉允登力禦不敵死

臣方煒按是時流賊混

天猴劫宜川令馬自然以求撫楊鶴受之處其部二千入于鄜州降卒白柳溪遂勾賊為亂混天猴向隸允登甘泉之變亦與焉見綏寇紀略謹附識

張光奎傳崇禎五年流賊躡山西

臣方煒按是時賊

以七月破大寧八月破濕州再破石樓壽陽見明紀
事本末謹附識

方國儒傳保康小邑素無兵七年正月賊至國儒急卒
鄉兵出禦力不支城遂陷

臣

方煒按是時山西河

北諸賊以六年十一月渡河十二月破鄆西上津明
年正月遂由房縣破保康見綏寇紀略謹附識

龐瑜傳賊至猝令跪瑜罵曰賊奴敢辱官長拔刀脅之
罵益厲賊掠城中無所有執至野外剖心裂屍而去

臣方煒按是年閏八月賊圍靜寧州旋破隆德縣固原道陸夢龍來援兵敗死之賊衆五十餘萬於是崇信與靈臺白水涇州後先皆陷見綏寇紀略謹附識

龐瑜傳

婁琇附

婁琇知涇州閏八月城陷死

臣

方煒

按一統志婁琇湘陰人天啓舉人崇禎中知涇州傳未晰謹附識

尹夢鼈傳崇禎中知潁州八年正月方謁上官於鳳陽

聞流賊大至立馳還賊已抵城下

臣方燁按是時

汝寧賊以正月七日攻潁州其支賊以初八日由固始夜薄霍丘三日而霍丘潰遂焚壽州之正陽鎮十一日破潁州屠之見明紀事本末謹附識

尹夢鼇傳

張鶴鳴附

鄉官尚書張鶴鳴弟副使鶴騰子

大同中書舍人田之潁知縣劉道遠光祿署正李生白訓導丁嘉遇舉人郭三杰諸生韓先祖等皆死之

臣

方燁按鶴鳴被害時年八十五賊倒懸射之鶴

鳴嚼齒大罵有賊刺刃者三曰若復能坐而鞭吾背
耶人始知其撫黔時有宿憾見明紀事本末謹附識
盧謙傳賊陷霍邱

臣

方煒按霍邱之陷在鳳陽未陷

之先迨鳳陽破自成偕高迎祥西趨歸德復入陝西
獻忠獨東圍廬州知州吳大樸固守不克攻巢縣破
之攻舒城知縣章可試開西門墜其溝誘賊入殺千
人賊遂退抵廬江陷之巢縣太湖皆被屠見綏寇紀
略謹附識

史記言傳老獬獬憤率數萬人攻城不克乘雪夜來襲而所練士方調他郡城遂陷

臣

方煒按是月朔秦

賊李自成等悉衆薄閭鄉左良玉禦之靈寶東祖寬禦之靈寶西不能支越四日陝州遂陷見明紀事本末謹附識

黎弘業傳崇禎八年流賊犯和州

臣

方煒按是時高

迎祥李自成攻廬州知府吳大樸合肥令熊文舉堅守不克自成遂進陷舍山犯和州見明紀事本末謹

附識

黎弘業傳守者皆潰賊遂入城

臣方煒按是時操江

臨淮侯李弘濟遣其將薛有年援和以遲發賊已破和而北有年中道失勢遂敗見綏寇紀略謹識

張紹登傳知應城縣九年賊來犯

臣方煒按是年十

一月張獻忠老獍等賊二十餘萬從均州新野等處分道入襄陽總兵秦翼明不能禦賊由漢江之羅家灘填土渡江遂以十二月破應城於是雲夢孝感

黃陂皆陷全楚震動見明紀事本末謹附識

王燾傳天大風雪守者多散燾知必敗入署整冠帶自經
臣方煒按時是副總兵楊世恩之兵潰于棗陽

隨州繼陷遂責世恩戴罪自贖見綏寇紀略謹附識
蔣佳徵傳設伏要害親率兵往誘賊殲甚衆賊怒環攻
之力戰死
臣方煒按是年七月皖城襲破六合圍

天長逼揚州揚大賈捐私財構竈丁及新舊官軍為
四營賊分掠瓜儀至僧道去之揚僅一舍知有備乃

北由岔澗破盱眙見綏寇紀略謹附識

徐尚卿傳崇禎十年十月李自成惠登相等以數十萬

衆入四川

臣

方煒按是時自成等以十月三日破

寧羌州分其軍為三一攻七盤一入廣元一向白水

侯良柱既敗歿遂入關於廣元烏龍山下結十七營

分兵守二郎關乃從淺灘過河破昭化見明紀事本

末謹附識

阮之鈿傳十一年正月之鈿未至張獻忠襲陷其城據

以求撫總理熊文榮許之處其衆數萬於四郊居民
洶洶欲竄

臣

方煒按獻忠就撫後文燦命簡精卒

二萬給餉餘散遣之獻忠請十萬人餉文燦為請銜
之賞給以六月餉獻忠具軍狀備調遣既命推官程
九萬調其兵檄之者三不應見綏寇紀略謹附識

阮之鈿傳賊衆漸出野外行劫

臣

方煒按城穀有河

為漢沔所匯獻忠立闕梁月徵其稅陳洪範軍士獲
義武營關防於草中請即以給獻忠兵科給事中張

縉彥持不可於是獻忠益驕見明紀事本末謹附識
阮之鈿傳至五月獻忠果反

臣方煒按是時陳洪範

所遣將馬廷寶徐起祚助防穀城者獻忠皆挾之去
見綏寇紀略謹附識

郝景春傳羅汝才率九營之衆請降於熊文燦

臣方

煒按所謂九營者汝才與一丈青小秦王一條龍為
鄖縣四營惠登相與王國寧常國安楊友賢王先恩
為均州五營見明紀事本末謹附識

郝景春傳分諸營於竹谿保康上津而自與貴雲祥居
房縣之野

臣方煒按汝才之降也文燦檄之從軍

汝才言不願為官無所事餉請受山田以耕鄖撫戴
東旻疏曰羅汝才詭占屯部帶刀以耘獻忠飽食休
甲據邑弄兵請敕將臣率鄔郢之卒督臣掃關內之
兵乘其不意一舉勦除不報見綏寇紀略謹附識

張克儉傳賊犯武安守備曹鳴鶚戰死遂犯輝縣

臣

方煒按是年二月左良玉挫於武安賊以三四萬從

趙寨而東都司蔡如薰禦之急呼曹鳴鶚與中軍馬
擢策應至卽原闕遇賊鳴鶚勝之翼日復力戰賊益
多火藥盡燿觀望不前俱死之見紀事本末謹附識

張克儉傳張獻忠羅汝才之敗也小秦王混世王過天
星等皆降

臣

方煒按小秦王混世王之降在十三

年七月至九月賊魁過天星及整十萬王光恩相繼
降見綏寇紀略謹附識

張克儉傳獻忠令人假督府軍符誑入襄陽城

臣方

煒按是年正月獻忠敗官軍於開縣席卷出川西赫驛置楚蜀消息中斷賊長驅至當陽袁繼咸方謀出軍獻忠令汝才與相持而自以輕騎一日馳三百里道殺督師使者取軍符以二十八騎持符襲入見明紀事本末謹附識

張克儉傳初獻忠敗於瑪瑙山其妻教氏高氏被獲他將搜山又獲其軍師潘獨鰲皆繫襄陽獄

臣方煒

按潘獨鰲為秦將鄭嘉陳大坪溪搜山所得見綏寇

紀略所謂他將者指此謹附識

徐世淳傳陳白糧利弊十一事悉允行

臣方煒按必

達所陳十一事食貨志諸書均無考謹識



明史卷二百九十二考證

附明史卷二百九十二考證後

乾隆四十一年

賜謚諸臣

史記言 王 信 郝景春

以上通謚忠烈

尹夢鼇 黎弘業 馬如蛟 阮之鈿 張克儉

以上通謚忠節

張允登 吳開先 李呈章 徐明揚 李中正

方國儒 劉定國 高日臨 王永年 郭震辰

田實 龐瑜 吉永祚 婁琇 蒲來舉

張鶴騰 朱國相 袁瑞徵 呂承庵 郭希聖

張鵬翼 周時望 李郁 岳光祚 陳永齡

盧謙 嚴寬 金應元 龔元祥 李君賜

楊道泰 阮我彊 白楹 梁志仁 楊呈秀

張紹登 王域 魏時光 蔣佳徵 吳暢春

王寅 陳正亨 楊道選 曹鳴鶚 鄺曰廣

黎民安 徐世淳

以上通謚烈愍

郭永固 郭景嵩 張光奎 張光璽 楊于楷

張友程 樂濟衆 何承光 董三謨 呂鳴世

趙士寬 田之頴 劉道遠 李生白 李從師

王廷俊 戴廷對 李邁林 王國訓 薄匡宇

趙躋昌 胡爾純 萬代芳 饒可久 王燾

徐尚卿 王時化 李大覺 余塙

以上通謚節愍